



Zwengalseiten

Rundbrief für Kinder

Nr. 14 ■ Dezember 2024



**Vorsicht
gruselig!**

Liabe Kinda, kennts ihr de Perchtn?

De gibt's in Bayern, in Österreich, in da Schweiz, in Südtirol und aa in Bulgarien.

De Perchtn lossn uns an de oide heidnische Göttin Perchta denga. Sie hod de Menschn vui Guads do. Des war ihr scheene Seitn. Aba wenn de Menschn auf de Natur und de Welt ned guad aufbasst hobn, dann hods richtig bäs werd'n kinna. Des war ihr schiache Seitn.



Drum gibt's aa de Schiachperchtn. Des san wuide Gselln mit gruslige Maskn. Do kann ma richtig Angst kriang. Aba es gibt aa de Scheeperchtn. De hobn aa Maskn. Aba de san schee zum oschaung. De spuin scheene Melodien auf eanane Glocknspui. Vor dene fürcht ma si ned. De Perchtn zoang oiso de scheene und de wuide Seitn von da Perchta.



De Perchtn zoang aba aa de scheene und de ned so scheene Seitn vom Winta. Ihr Kinda kennts hoffentlich nua de scheene Seitn. Do kann ma Schlittn fahm und Schlittschua laffa und Schi fahm. Ma kann sis drinna gmiatlich macha und mia feiern scheene Feste im Winta. Aba fia de Viechal is da Winta scho aa schwaar. Si finden nimma vui zum Fressn, es is koid und ungmiaulich, sie miassn friem. Sie kennan oiso aa de schiache Seitn vom Winta.

Friara hobn de Menschn gmoant, da Winta is deswegn so hart, weil do Wintergeister eana Unwesn treibn. Aba wissts ihr, wos de Wintageista gar ned meng? Lärm, Krach, wuide Gselln und Menschn de mitnand feiern. Vielleicht sans deswegn ois Perchtn verkleidet durch de Gegnd glaffa. Damit de Wintergeister vorschwindn.





Liabe Kinda, ihr brauchts fei koa Angst vo de Perchtn hobn! De san zwar laut und wuid und schaug greißlich aus, aba ihr seids ja Kinda und koane Wintageister. De Perchtn san verkleidete Menschn. De dean eich nix.

Wer si de Perchtn genauer oschaung mog. Fia de hobn mia zwoa Internetseitn gfundn. Aba bitte schaugts es eich mit am Erwachsenen o. Ma konn scho erstmoi daschrecka.

<https://www.perchten-kirchseeon.de/>

https://www.suedtirol-tirol.com/Traditionelle-Perchten%C3%A4ufe-in-Tirol/news_detail/436.htm

Eia Schnuffi Mankei und Leo Löwe. De Imp is scho im Wintaschlof!

Herausgeber und Verleger:

Förderverein Bairische Sprache und Dialekte e.V.
Salzburger Str. 62a, 83435 Bad Reichenhall
Telefon: 0865 1-7680098
E-Mail: info@fbsd.de
Internet: www.fbsd.de

Bild, Grafik und Text:

Birgit Hackl, Baldham
Claudia Geisweid, Altomünster